

- दीपोत्सव री कड़ी मांय आस्था अर उमाव रे साथे आज घणकरी ठोडां गोवर्धन पूजा अर अन्नकूट रा आयोजनां री धूम।
- उपमुख्यमंत्री दिया कुमारी कयो –प्रदेश मांय सैलानी विकास सारु नुवा सैलाणी ठोड तियार करना अर तकनीक ने बधावो देवणो जरूरी।
- कुंभलगढ़ मांय राज्य रो छठो टाइगर रिजर्व बणायो जाएला।
- प्रदेश मांय बत्ती रा अर कमती रा तापमान मांय कमी दर्ज-कुम्भ ठोडां सांझ-संवारा हलकी ठण्ड रो अहसास बध्यो।

000

दीपोत्सव री कड़ी मांय आज देश-प्रदेश मांय घणकरी ठोडां गोवर्धन पूजा अर अन्नकूट रा आयोजन व्हे रिया है। घरां अर मिन्दरां मांय गाय रा गोबर ऊं गोवर्धन पर्वत बणार विधिपूरण पूजन करी ज्यो। राजधानी जयपुर मांय गोविंद देवजी समेत दूजा मिन्दरां मांय अन्नकूट महोत्सव मनायो जावे। आं मांय गोवर्धन पर्वत अर छप्पन भोग री झांकियां सजाई ज्यी है। टोंक जिला रा नामी डिग्गी कल्याण जी मिन्दर मांय खास पूजा अर्चना करने भक्तां ने अन्नकूट प्रसादी बांटी जावे। चूरु जिला रा सालासर बालाजी मिन्दर मांय आज खास आरती करीजी। बृज हलका रा भरतपुर मांय गोवर्धन पूजा ने लेर खास उमाव बण्योडो है। गोवर्धन परिक्रमा सारु ई घणी तादाद मांय श्रद्धालु पूग्या है। प्रदेश रा गांवाई हलका मांय आज केई ठोडां मवेशियां ऊं जुड़ी न्यारी-न्यारी रीतां निभाई ज्यी। बळदां अर पशुधन ने मोहवणा सजार वां री पूजा करीजी। ई मौके पाली मांय बेलां रो सिणगार करने अर दौड़ री होड़ां राख्यी।

.....

सांचौर जिला रा डावल गांव मांय ई ऊंट अर घुड़दौड़ रो आयोजन व्ह्यो। इण मांय राज्य रे अलावा गुजरात रा मवेशी पालक ई पूग्या। बांसवाड़ा मांय गायों री दौड़ व्ही। सवाईमाधोपुर, कोटा, झालावाड अर सिरौही समेत दूजी ठोडां माथे ई महिलावां गोवर्धन री पूजा करने सुख समृद्धि री कामना करी। दीपोत्सव री कड़ी मांय कुछ ठोडां आज भाईदूज रो तिवार ई मनायो जावे। ई दिन बहनां आपरा भाइयां रे तिलक लगार वां री लाम्बी उमर अर खुशहाली री कामना करे है। कुछ ठोडां भाईदूज काले मनाई जावेला। जैन धर्म रा 24वां तीर्थंकर भगवान महावीर स्वामी रो निर्वाण महोत्सव आज ई मनायो जावे। ई मौके जिनालयां मांय खास पूजा करीजी। सीकर रा दिगम्बर जैन मिन्दर मांय आज निर्वाण महोत्सव रो आयोजन करी ज्यो अर मोक्ष कल्याणक लाडू चढ़ाई ज्यो। दीवाळी रे पछे अबे छठ तिवार री तैयारियां ई सरु व्हे ग्यी है। श्रीगंगानगर मांय ई सारु नहर किनारे अस्थायी घाट बणाया जावे। पर्व ने देखता नहर री साफ-सफाई रो काम ई करयो जावे। छठ पर्व 5 नवंबर ऊं सरु व्हेर 8 नवंबर ताई चालेला।

000

मुख्यमंत्री भजनलाल शर्मा आज डीग पूग्या। वणा जिला रा पूंछरी मांय श्रीनाथ जी मिन्दर मांय गोवर्धन पूजा करने प्रदेश री सुख समृद्धि री कामना करी। ई मौके मुख्यमंत्री ने सात कोस री परिक्रमा करण वाळां ऊं मिल्या। वटे ई उपमुख्यमंत्री दिया कुमारी जयपुर मांय आज दीवाळी स्नेह मिलन जळसा मांय हिस्सो लियो। ई मौके वणा कयो के सरकार, प्रशासन अर सगळा लोगां ने राजस्थान ने देश मांय अगुवा राज्य बणावण सारु मिलने काम करणो व्हेला। वणा सैलाणी विकास माथे जोर देवता कयो के ई सारु नुवी सैलाणी ठोडां तियार करण रे साथे ई ई हलकां मांय तकनीक ने बधावो देवणा जरूरी है।

000

रेलमंत्री अश्विनी वैष्णव तिवारी सीजन मांय जातरियां सारु करीजी खास सुविधावां अर बन्दोवस्तां री समीक्षा करी। वणा काले सिंज्या नुवी दिल्ली रेलवे ठेसन रो दौरा कर्यो। रेलमंत्री ठेशन माथे जातरियां ऊं बतळ ई करी। ई बीचे दीवाळी रे पछे छठ पूजा रे मौके जातरियां री सुविधा सारु खास रेलगाडियां चलाई जावे। उत्तर रेलवे रा प्रमुख जनसम्पर्क अहलकार बतायो के तिवारी सीजन रे दौरान उत्तर रेलवे कानी ऊं दिल्ली रा खास रेलवे ठेसनां ऊं 3 हजार 200 ऊं बत्ती खास रेलगाडियां चलाई जावे। वटे ई श्रीगंगानगर अर जयपुर रे बीचे जातरी भार ने देखता आज एक खास रेलगाडी चलाई जावे। उत्तर पश्चिम रेलवे रा मुख्य जनसम्पर्क अहलकार कैप्टन शशि किरण बतायो कै काले 26 तिवार स्पेशल रेलगाडियां चलाई जाएला।

000

दीवाली स्नेह मिलन अर शुभकमानावां लेवण-देवण रा सिलसिला रे साथे ई उपचुणाव वाळा हलकां मांय उम्मीदवारां रो लोगां ऊं मिलणो जुलणो ई चाले। न्यारा न्यारा राजनीतिक दलां रा उम्मीदवार घर-घर जार

वोट देवण वाळां ऊं मान मनुहार कर रिया है। सात चुणाव हलका मांय होवण वाळा उपचुनाव मांय देवली-उनियारा ई महताऊ सीट है। इण माथे सगळां निजर टिक्योडी है। म्हारा टोंक खबरनवीस बतायो के दोन्यू खास पार्टियां भाजपा अर कांग्रेस रे साथे ई दूजा उम्मीदवार मतदातावां ने साधण री कोशिश कर रिया है।

000

कुंभलगढ मांय राज्य रो छठो टाइगर रिजर्व बणायो जाएला। राष्ट्रीय बाघ संरक्षण प्राधिकरण इण ने मंजूरी दे दी है। सरुआती चरण मांय ई हलका मांय चार बाघ लाया जाएला। ई रिजर्व रो हलको एक हजार 397 वर्ग किलोमीटर व्हेला। म्हारा राजसमंद खबरनवीस बतायो के ई टाइगर रिजर्व री हद उदयपुर, राजसमंद, ब्यावर, पाली अर सिरोही जिलां ताई प्रस्तावित है।

000

अंतरराष्ट्रीय ख्यात नाम पुष्कर महोत्सव रे तैत आज पशु मेळा री सरुआत व्ही। ऊंट, घोड़ा अर दूजा मवेशियां रे साथे मवेशी पालकां रो मेळा मैदान माथे पूगण रो सिलसिलो चाले। पशुपालन महकमा रा संयुक्त निदेशक डॉ. सुनील घीया बतायो के पशु अर पशुपालकां ने प्रशासन कानी ऊं केई तरह री सुविधावां दी जावे। मेळा मैदान माथे चार नवम्बर ने पशु चौकियां थापित करी जाएला। अतिरिक्त जिला मजिस्ट्रेट गजेन्द्र सिंह समेत दूजा प्रशासनिक अहलकारां आज मेळा हलका रा बन्दोवस्तां रो जायजो लियो। 9 नवम्बर ने झंडा चढावण रे साथे ई धार्मिक मेळा री औपचारिक सरुआत व्हेला।

000

चित्तौड़गढ-भीलवाड़ा राष्ट्रीय राजमार्ग माथे व्हा एक सड़क हादसा मांय एक बुजुर्ग दम्पत्ति री मौत व्हे ग्यी। हादसो मेड़ीखेड़ा फाटक पुळिया माथे तेज रफतार आय री कार री टक्कर ऊं व्ह्यो। दोपहिया वाहन माथे सवार धणी लुगाई पुळिया रे नीचे पड़ ग्या अर वणा मौका माथे ई दम तोड़ दियो। वठी ने भीलवाड़ा जिला रा आसींद हलका रा नारायणपुरा गांव मांय एक कारखाना मांय बॉयलर फाट जावण ऊं दो मजूरां री मौका माथे ई मौत व्हे ग्यी। हादसा मांय कारखाना री छत ई पड़ ग्यी। ई हादसा रे पछे आखा गांव मांय शोक री लहर है। उठी ने बाड़मेर रा सनावड़ा गांव कने मोटरसाइकिल सवार दो मिनखां री एक कार ऊं टक्कर रे कारण मौत व्हे ग्यी। वठै ई बीकानेर रा लूणकरणसर हलका मांय मोटरसाइकिल अर पिकअप री आमी-सामी री टक्कर मांय दो लोगां री मौत व्हे ग्यी। नागौर रा डीडवाना मांय एक कार रे पलट जावण ऊं पांच लोग घायल व्हे ग्या। आं मांय दो री हालत चिंताजोग है। घायलां ने डीडवाना रा बांगड़ अस्पताल मांय भर्ती कराई ज्या है।

000

प्रदेश मांय बत्ती रा अर कमती रा तापमान मांय कमी दर्ज करीजी है। फेरु ई कुछ ठोडां तेज धूप रो असर है, कठे-ई-कठे सांझ-संवारा हळकी ठण्ड रो अहसास व्हे रियो है। आज सीकर अर हनुमानगढ रा संगरिया मांय कमती रो तापमान 15 दशमलव 5 डिग्री सेल्सियस रियो। वठै ई भीलवाड़ा, धौलपुर, बारां, करौली अर श्रीगंगानगर मांय कमती रो तापमान 17 डिग्री सेल्सियस रे आरे-सारे दर्ज व्ह्यो। बाड़मेर मांय बत्ती रो तापमान 37 दशमलव 8 डिग्री सेल्सियस दर्ज करी ज्यो। फेरु ई काले रे मुकाबले अठे बत्ती रा तापमान मांय कमी आई है। मौसम केन्द्र जयपुर मुजब प्रदेश मांय सात नवम्बर ताई मौसम सूखो रेहवण री आस है अर तापमान मांय बत्ती बदलाव री आस नी है।

000

केंद्रीय पर्यटन मंत्री गजेन्द्र सिंह शेखावत आज जोधपुर रा महेन्द्र राठौड़ ने अंतिम विदाई दी। श्री राठौड़ री लारला दिनां कांगो मांय मौत व्हे ग्यी ही। श्री शेखावत रा तुरत कोशिशें ऊं वां री पार्थिव देह भारत लायी जा सकी। ध्यान जोग है के श्री महेंद्र रा पिरवार वाळा केन्द्रीय मंत्री श्री शेखावत ऊं मदद री गुहार करी ही। श्री शेखावत आज महेन्द्र रा रेहवास माथे जार वां ने सिरधा रा फूल अरपण करया अर पिरवार वाळां ने ढांडस बंधायो।

000

भारत री कृषा वर्मा अमेरिका रा कोलोराडो मांय अंडर-19 विश्व मुक्केबाजी होड मांय सोना रो तमगो जीत्यो है। फेरु ई सोना रा तमगा री दौड़ मांय भेळी पांच दूजा भारतीय मुक्केबाज आप-आपरा फाइनल मुकाबला मांय हार जावण रे कारण सोना रा तमगा ऊं चूक ग्या। कृषा जर्मनी री लेरिका ने पांच शून्य ऊं हराया। वठै ई 48 किलो महिला वर्ग रा फाइनल मांय चंचल चौधरी इंग्लैंड री रुबी व्हाइट ऊं हार ग्यी। इण वर्ग मांय भारतीय मुक्केबाज ने अयोग्य ऐलान कर दीरीज्यो। जिण रे कारण वां ने चांदी रा तमगा माथे संतोष करणो पड़्यो। आज रात निशा, सुप्रिया देवी थोकचोम अर पार्थवी ग्रेवाल समेत पांच अर महिला मुक्केबाज सोना रा तमगा सारु मुकाबला करेली। फाइनल मांय सोना रा तमगा सारु पुरुष वर्ग मांय हेमंत सांगवान रो मुकाबलो अमेरिकी मुक्केबाज रिशोन सिम्स ऊं व्हेला।

000